

NAZIO BATUETAKO SEGURTASUN KONTSEILUAK AHO BATEZ ONARTU DU IDAZKARI NAGUSIAREN MISIOA

Annanek dio «arrakasta lortzeko aukerak» badituela bihar Bagdaden


Kofi Annanek Nazio Batuetako Segurtasun Kontseiluko 15 herrialdeen babesa jaso du Irakera joateko. Nazio Batuetako idazkari nagusia bihar helduko da Bagdadera, eta hiru egunez egongo da han. Pertiako Golkoan gerra eragozteko azken aukera da Annan hara joatea.

Agentziak/ New York

KOFI ANNANEK bihar Iraken hasiko duen bidaiak «arrakasta izateko aukerak» badituela esan zuen atzo. Annan Nazio Batuetako Segurtasun Kontseiluarekin bildu zen atzo, eta bileraren ondoren itxaropentsu mintzatu zen bere misioaz. «Irakiarrek prest daude jarrera konstruktibo bat izateko, nazioarteko azterketen inguruan sortutako krisia amaitzearen», azpimarratu zuen Annanek. Nazio Batuetako idazkari nagusia bihar helduko da Bagdadera; han, besteak beste, Saddam Hussein lehendakariarekin elkarrizketatuko da.

Segurtasun Kontseiluak aho batez onetsi zuen atzo Annanen misioa. Idazkari nagusia pozik zegoen horregatik, baina EEB-Bek adierazi zuten Irakek Nazio Batuen erabaki guztiak onartu besterik ez duela egin behar. Bill Richardson EEBBen Nazio Batuetako enbaxadoreak babestu egin zuen Annanen misioa, eta irtenbide diplomatikoa lortzearen garrantzia nabarmendu zuen. Richardsonek argitu zuen, ordea, Annanek Segurtasun Kontseiluaren ahozko akordio bat duela eta ezin duela negoziatu.

«Segurtasun Kontseiluko bost kide iraunkorren (EEBBak, Frantzia, Erresuma Batua, Errusia eta Txina) mezua horixe da: onena desio diogu eta misioan arrakasta izan dezala espero dugu; irtenbide bat nahi dugu. Baina oso argi daukagu ez duela akordiorik izan behar hiru baldintzetatik aparte», esan zuen Richardsonek. Baldintzak hauek



Kofi Annan, Nazio Batuetako Segurtasun Kontseiluaren babesa jaso eta gero.

RICHARD DREW

dira: leku guztiak baldintzarik gabe aztertzea, Nazio Batuetako Desarmarako Batzordea (UNSCOM) errespetatzea eta Segurtasun Kontseiluaren erabakiak zorrotz betetzea.

Bagdadera bidean Parisen egingo du gaurko gaua Annanek, eta han Jacques Chirac Frantziako lehendakariarekin hitz egingo du.

Annanek misioan huts egiten badu, oso litekeena da EEBBek aire bidezko erasoak berehala hastea. Bitartean, Bill Clinton EEBBetako lehendakaria informazio kanpaina bat egiten ari da,

estatu batuen konbentzitzeko erasoaren beharraz.

EEBBak, eszeptiko • EEBBetako Gobernuak ez du uste Annanen bidaiak emaitzarik izango duenik. Bai, ordea, Etxe Zuriko Segurtasun Nazionalako kontseilari Sandy Bergerrek. Azken unean Husseinek iritzia aldatzen duen lehen aldia ez dela izango adierazi zuen Bergerrek. Iritzi bera azaldu zuen Klaus Kinkel, Alemaniako Atzerri ministroak. Annanen misioak «oso aukera handiak» dituela esan zuen Kinkel. Hubret Veldrine Frantziako

Atzerri ministroa zuhur azaldu zen, eta askoz baikorrago mintzatu zen Hosni Mubarak, Egiptoko lehendakaria. «Elementu positiboak zituen mezua jaso dut Husseinengandik», esan zuen Mubarak, baina ez zuen zehaztu elementu horiek zeintzuk ziren.

Jacques Santer Europako Batzordeko lehendakaria pozik azaldu zuen Annanen bidaiarekin, eta auziari irtenbide diplomatikoa eman behar zaiola nabarmendu zuen.

EEBBetako Kongresua irtenbideak aztertzen ari da Bagdadek

ez dezan arma nuklear, kimiko eta bakteriologiko gehiago sortu. Erasoak izanez gero abian jartzeko plana landu dute Kongresuko errepublikanoek: Irak Askea irratia sortzea eta Irakeko leku jakin batzuetan zigorrak kentzea. Oposizioko taldeen koalizio bat legeko gobernu gisa onartzea aurreikusten du planak.

Erresuma Batuko Atzerri Ministerioak atzo kaleratu zuen informazioaren arabera, Irakeko lehendakaritza jauregiak ez dira ohiko jauregiak, Londres erdigunea bezain zabalak diren industrialde batzuk baizik. X

Beste hogeita hiru zibil hil dituzte Algerian, Tlemecen probintzian

Segurtasun indarrek ustezko 67 islamista armatu hil dituzte egunotan

Agentziak/Aljer

ALJERIAKO segurtasun indarrek jakinarazi dutenez, herenegun gauean islamista armatu talde batek Tlemecen probintziako herri bati eraso zion, Sidi-Jilali izenekoari, eta hogeita hiru pertsona hil zituen. Agiri bat plazaratu zuten segurtasun indarrek sarraski horren berri emanez, baina ez dute zehaztu hilketa nola egin zuten, eta hildakoei buruzko datuak ere oso eskasak dira.

Azaldu dutenez, herritik alde egin zuenean egin zuen sarraskia islamista armatu talde horrek; ondoko herri bateko autodefentsa talde bat bidera atera

zitzaien, eta, bi taldeen arteko enfrentamenduen ondorioz, islamistek bat hil zen.

Aipatu iturrien arabera, Armadako tropak berehala mobilizatu ziren ihes egitea lortu zuten komandoko kideak harrapatzeko. Nabarmenezkoa da Algeriako prentsaren arabera Armada islamista armatuen kontrako operazio handi bat egiten ari dela egunotan Tlemecen eta Sidi Bel-Abes probintzietan, hau da, azken sarraskia gertatu den inguruan. Operazio militar hori dela medio, 67 islamista hil dituzte orain arte, eta, gainera, arma eta lehergailu biltegiak atzeman dituzte.

Joan den igandean, Bense-

kran herriko (Tlemecen probintzia) etxalde batean ustezko zortzi islamista armatu hil zituzten segurtasun indarrek, eta haien gorpuen irudiak eman zituen atzo telebistak. Bala zulo ugari zituzten zortzi pertsona horien hilotzek. Segurtasun indarrek azaldu dutenez, Talde Islamista Armatuak (GIA) talde bat osatzen zuten, eta azken Ramadana hasi zenetik hamalau pertsona hil zituzten.

AISeko 15 kide errenditu dira • Bestalde, Salbaziorako Armada Islamikoko (AIS) ustezko hamabost kidek Collo hiriko agintarien esku utzi dituzte euren buruak



Barakin iaz izandako sarriski batetik bizirik irtendako bi neska.

AP

aste honen hasieran, *Le Soir* egunkariak atzo plazaratu zuenez. Salbazio Islamikoko Frontea (FIS) lege kanpoko alderdiaren adar armatua da AIS, baina

iazko urrian su-etena aldarrikatu zuen. Hamabost pertsona horiei etxera joateko baimena eman zieten, odol deliturik egin duten aztertu bitartean. X